

四庫全書

集部

欽定四庫全書

新安文獻志卷七十

明程敏政撰

行實

儒碩

許著作

文蔚

墓誌銘

程振

士林之論以公有不可學者三焉權勢人之所趨也方
權臣擅柄之日詣其門者立登丞弼公惡其為人至不
造銓部富貴人之所欲也公以小宰梁公薦有掌故之
命矣乃五年臥家不以姓名自達張叅政開督府辟公

為屬公力辭避且極言調發之非貧賤人之所惡也自
壯至老布衣蔬食一室蕭然疎幃敗席有野人之所不
堪者五十年官學之積委諸橐中居乏寸椽耕無尺地
而經理曾不及焉蓋公之學一出於誠壯從諸公遊晚
而授學者一言一行悉以不欺為主故凡出公之門者
質而不華誠而不偽厚而不薄望而知其為公之徒也
嘉定紀元公始赴調五年差戶部架閣十月除國子錄
又十月三日除國子博士逾年改京秩遷太學博士六

年十月除秘書郎兼莊文府教授七年九月除著作佐郎兼權兵部郎官八年正月除秘書丞五月除著作郎兼職如故某年某月寢疾某日終于官舍子植求銘嗟夫碑郭有道吾何媿乎公嘗有言國之強弱在元氣元氣之盛衰在風俗風俗之振作在立表表立朝廷之上影從四海之間表立矣而風隨仆之吾其如天何公諱文蔚字衡甫新安休寧縣人銘曰

大閑耽耽皇極巖巖天下泰山萬邦所瞻毋曰賸賸幸

有表在惜哉歲闌訾黃不再

通者朝廷命部使者遍歷郡邑召山林儒士修輯各

郡志書以備史館編錄實盛典也尚因得盡會吾諸先達於建初僧舍朝夕講論伏觀舊志具述吾先世祖兵部公講學之原出仕之詳著作之粹贈族之仁昭昭可考下懷不勝欣忭竊思祖德弗彰子孫之罪於是謄錄事蹟以廣其傳後之覽者必將興感而効慕也因贅簡末以記歲月永樂戊戌季秋十九世孫尚拜書

宋錢融堂

時本傳

宋史

揚簡門人錢時字予是淳安人幼奇偉不羣讀書不為世儒之習以易冠漕司既而絕意科舉究明理學江東提刑素甫作象山書院招主講席學者興起政事多所

裨益郡守及紹興守皆厚禮延請開講郡庠其學大抵
發明人心論議宏偉指擿痛決聞者皆有得焉丞相喬
行簡知其賢特薦之朝且曰時風負才識尤通世務田
里之休戚利病當世之是非得失莫不詳究而熟知之
不但通詩書守陳言而已授秘閣校勘詔守臣以時所
著書來上未幾出佐浙東倉幕太史李心傳奏召史館
檢閱轉對敷陳剴切皆聖賢之精微旋以國史宏綱未
畢求去授江東帥屬歸其書有周易釋傳尚書演義學

詩管見春秋大旨四書管見兩漢筆記蜀阜集冠昏記

百行冠冕集寶祐間守李鏞祠于學

錢母墓記是為有宋大理寺丞錢公

隱之母夫人墓夫人羽林上將軍之妻昭化軍節度使靖宣公之衆婦吳越文穆王之孫婦也寺丞迎官新安因家汝溪葬夫人小溝上距寺丞墓可三十步中罹兵火歲遠地殊則未免陵夷村童之手痛可傷恨幸接壤皆親故可語以情紹定六年癸巳二月有二日時領姪輩御辛茹素正兆域明禁界遷路墓外踰丈明日戊寅社載封之崇四尺立墓額焉夫人四世孫憲齋建炎間提鄉兵迎敵烏珠于桐江之牛山江東部使者索公甫偉而祠之聞于上前年賜廟額英烈將褒封矣夫人實新安始祖妣因循泯泯淪於荒莽謂子孫何哉乃為之記建寺丞墓道門勒石其下寺丞墓之右當埋所乘白馬有丘隆然可指今鄉人皆曰白馬墓云七世孫時敬書

宋故朝奉大夫直龍圖閣金公

文剛

墓誌銘

林希逸

淳祐甲辰予初識公於朝中一見如素交居無何公去
省鑰守清江予解翰直守莆陽予番易人公歸里徽與
番鄰書疏無虛月後十年予屏居餘干聞公以浙西庾
使卒又五年其子以狀謁銘覽之愴然曰此吾友金子
潛也如之何勿銘公出名從家言動有家法初補長沙
民曹受知西山真文忠公以攝邑釐籍書賑飢具方略

也自此為文忠門人再調常州法曹攝李掾暴守囚劇盜株連數十家公言按驗無狀守欲強伏之力爭不已守怒移公征官公處之怡然主湖南帳司用薦者五人知奉新縣金人至淮流民突入境肆殺奪公鈎致其桀數人語之曰若屬欲得食邪抑將為亂邪皆曰願公活我公使互相保識乃籍其姓名凡戶六千口六萬分為三轄析三十六部轄以邑士部以其黨耕者販者別處之怙暴者入赤籍窮悴者庸大家立約束數條事在令

前不問俄有異謀者公以計誅之百里帖然徐請于大
閫因屯田遣其歸具舟楫糗糧甚厚且戒之曰爾毋生
事煩疆吏大閫不汝赦也其人感公至意扶涕泣而
去臺閫上其事擢倅興國軍邑父老乞留漕以聞朝廷
許之秩滿除帑轄公建言庫有名物與籍異請覈會其
實使某羨某耗具明庶宿弊可革從之監進奏院以薦
書讞奏諸道紛來從前漫莫考具日月籍之至今為定
法監三省樞密院門輪對陳備敵理財二策其言曰餉

素積則師無飢兵素練則戰不怯將帥閒居當如在戰場險要必備當如塞漏穴又曰邸第右戚有常俸而非時泛賚撥降營造當損閹尹寺人有常廩而非時錫犒希悅求得當抑百司胥吏俸銀二衣倍於執事當省又條上封樁十弊朝廷皆是之出知臨江軍寇餘糴貴公取西山長沙規約視土風事宜增損行之憲車以治績聞其間有曰綏字間閭討求荒政推行有法曲盡其心人以為實錄郡有賑民倉積久幾廢公節縮補增至餘

七千石俄而帥漕總三司各糴于郡石五萬至十萬公以書爭曰歲入苗斛纔七春夏積潦請之倉臺求之巨室僅僅無轉徙糴雖國計民為本可撥乎帥譙公欲黥吏公曰守可汰吏可黥民食不可奪諸司不能屈通減過半民德公牛車擔負爭先應令及以風聞去父老泣送踰十數舍奉崇道祠起知建昌軍又辭癸丑除知撫州再辭改常德府論者曰近之舍而遠是即可以觀所守矣乙卯以太府丞召陞對言人才最急選用必以心

術聞望為先又論守藏之臣任宜久毋以計日望遷之
官與長子孫之利遷右曹郎官丁巳提舉浙西常平茶
鹽義倉時釐計久弊上銳欲革之程丞相曰必欲得其
人非金某不可公至推尋仍習窠罅日夜忘飢渴去冗
員刷弊例鹽本無遠近必面給之言於朝曰鹽以虛籍
相授諸場皆然其或久隱而不言則某有罪言之則罪
者不止某與其急於追求不若寬以求足許之明年課
入羨數倍亭民竈戶得所熙熙然不待迫而辦最聞褒

遷將作監再留陞直寶謨閣然公以勞苦致疾矣俄有
旨兼攝餼事苦辭改知太平州以疾請老進直龍圖閣
終于倉臺正寢晨興具疏既手書家事纖悉與夫歛葬
之具沐浴整衣冠焚香坐而逝時寶祐六年十月十七
日也享年七十有一階止朝奉大夫公莊重修潔燕居
如肅賓蒞官嚴而明求民利病如嗜慾事無大小必為
久遠計居鄉門外事不入耳雖以才見用而趣學甚深
日誦西山先生心經閒居守書案不置初魁銓闈有勸

以復世科者曰等是青衫皆可行志何以競進為慕文
正范公義田與其季英德史君文郁約共為之英德卒
其子大鏞市田百畝以先公喜曰汝父不死矣及來淞
右以俸賜三萬緡益之又為祭田春秋祀事皆有式字
其弟文輝之孤如子歲儉下廩直周其鄉貧者貸之其
平生鄉善卒如是卜築近郊曰東山古木脩篁往來成
趣嘗曰他日埋我必於是景定四年十月十二日清孫
奉治命寔焉曾祖裕贈通議大夫祖安節紹興名濬從

贈少保謚忠肅公節惠之命公所請也父侃朝請大夫
通判揚州世居休寧孝芝里公名文剛三娶魯氏程氏
鍾氏一子將仕郎清孫也銘曰

仕之初師真儒誦至老西山書飢民活流民定入有言
出有政齟齬易挽汲難白髮召終身閒使雖勞止蠅誤
庾則褒騎鯨去歿所瘞生所游東山下銘斯丘

宋象山書院山長月巖先生程公

紹開墓表

方回

嘉熙戊戌昭武賴公棟以戴經魁省闈其文天下誦焉
上饒程公及甫師事之得其傳年二十九庚子貢于鄉
淳祐壬子再貢為首寶祐丙辰伏闕上書萬言重臣不
可一日無權臣不可一日有權臣指丁大全也未幾入
太學時大全在政府倚宦豎肆凶虐嗾御史翁夢弼吳
衍論竄六士陳宜中等大全以沈翥為腹心方大猷為
耳目猥以章應雷為援而舉之開慶己未大全相之二
年私周震炎魁天下應雷甲科第三人士論切齒大全

嘗令翦以幣致公毅然謝絕自六士逐即家食不出大
全斥六士返翦大猷放嶺海震災應雷奪恩數公欲歸
齋而丁外艱越三年升上舍長存心齋咸淳丁卯元日
郊前序率諸生表請幸學蓋賈似道柄國以小惠蠱多
士耳公曰幸學可也請幸以覲恩不可也辭不預拜表
列尋又辭推恩前序以譖於祭酒雷宜中召公譙責問
故公不屈拂袖竟歸傾二十齋之士餞關外明年戊辰
中龍飛榜乙科授從仕郎當注職官僅取增差臨汝教

兼掌書堂兩攝東西倅賑荒埋胔竭力助郡政再調寧
海軍節推母訟子不孝尹欲寘重辟公令子百拜未半
母心悔子之如初德祐乙亥以承直郎禮兵部架閣杆
鄉郡公之再自太學歸也以布衣長象山書堂至是再
為之逮己卯三為之至元庚辰十二月六日以疾卒生
嘉定壬申年六十九公諱紹開其先五代時自歙遷信
貴溪至公凡十四世曾大父惟幾大父光祖父自強迪
功郎致仕娶翁氏子男三人楷鳳飛植植先公四年卒

女二人婚鄭中陳近仁初丙子象山書堂災公畢力再造士嘉乃績丐與山長素公甫竝祠平生授徒於家自為道一書堂楷兄弟增廣之楷今為書堂山長鳳飛德安府儒學教授孫男七人皆向學孫女三人以癸未二月丙午葬于故居之鼎山坐乾面巽公生夢得此地卜居三十餘年就為佳城公歿之十四年癸巳楷與紫陽方回遇于武林以回先人嘉定甲戌上舍亦嘗為存心長且歛人請銘公墓回惻然感傷思近時人才衰少世

事敗壞之故乾淳以後無重臣侂遠全道及再相之舊
學皆權臣抱實學者受誣負重名者招忌死黨阿附者
致大位無一善可書大節一二可書者乃皆出於寒士
下僚如此而欲國不僨不可得也公未仕時所立已卓
既仕坐視權臣覆餗迄如公丙辰之言雖大書特書足
垂不朽度公方且哀痛於九泉之下亦豈忍聞哉公學
贊朱陸超然有得於言語之外家塾之額曰道一志可
知己第回少公十五歲豈敢銘公敬為墓表叙其行實

系以詞曰丁以威脅策吾度賈以利啖輪吾祝屈而從之早仕而已寧見道而良背寧取義而責趾人有生孰

不死不可滅廉與恥

程鼎寶贈言凡冬大雪來歲必大熱松脂入地久而成茯苓為琥珀

是何也陽氣閉藏而不發泄則地力厚而生物也茂木之滋液于華葉者未甚遂則灌注本根凝為靈藥異寶理固宜也世之賢人君子可以大用而不獲盡其用其有餘不竭之澤流行於後往往如此月巖先生程公明戴氏禮貢于鄉選于上庠毅然為多士先志行清峻嚴恪不苟合不輕進而溫乎四海為春之意行乎萬仞磔卓之間嗚呼使公而展所蘊名公卿也而被其澤者幾千萬人然而巖崎歷落年餘五十乃擢乙科官至京府元僚而止逾一紀始以康寧壽考終嗚呼乾坤龍亢龍戰之會鮮有不傷三百年雨露膏澤之物煜然春榮一

旦槁如秋後之園林蓋天運使然柳子所謂咸宜韓子所謂薄功而厚饗豈皆非邪公歸田山中而家日以肥子孫繁碩且賢公沒之後悉為當路所禮起家以任此非公之所留者乎予公門人也識公二子矣世孫鼎寶教授海陵官滿而人士誦之不渝不墜其學不忝其世德此非公之所留者乎嗚呼天之生賢人君子也以爲民也公抱賢人君子之器百不及一二試今二子諸孫俱有位方日進而日升一命以上可賜於民小大多寡分數不同爾公不獲大用於昔若子若孫以之小試於今焉此賢人君子之胄所以繼先志而天之所以生賢人君子之心也其母曰位不足以行其母曰時不可以行夫今昔殊時而今之民猶昔之民天豈遽亡之哉斯言也昔嘗聞于公而非迂也鼎寶尚以斯言諭於父兄大德八年六月二十有二日臨川門人吳澁書于淮東儀真寓舍

宋故辟雍造士程公先生

時登

行狀

許瑤

先生諱時登字登庸饒之樂平人姓程氏程氏族望東南者皆出梁鎮西將軍忠壯公靈洗蓋與河南之宗共派歛饒接境其族居宦學四方者尤衆而吾樂平梅岩一族夙以詩書孝謹聞宋淳熙間有職都巡諱綸者與其弟濯纓府君諱元度兄弟友睦有稱於時濯纓於先生為曾祖考易軒府君諱夢予從慈湖先生受業學究淵微根極體要氣和行方名列副貢先生其長子也母

洪氏先生生有異稟強學博聞年十三易軒府君命從師為義理之學鄰邑德興樂澗董先生銖得考亭夫子之傳其鄉鄰有程正則先生亦私淑考亭之學易軒以禮延致之俾先生終始從之游搜幽抉微鉤深牖明博極經傳之奧探賸性命之原斟酌羣言條分縷析守約務實以一其歸如是蓋十餘年而先生之學底于成咸淳甲戌邊境大震松江諸郡被兵遂混江東九路之士而試於饒師生偕隨計吏及榜揭先生褻然舉首程公

素剛方狷介於從學者不少借以顏色先生每曲意婉從左右就養有隱無犯明年登上庠朝列舉於鄉得封其父母初階遂於吏部領給誥以遂榮親之志又明年而宋鼎移矣先生歸杜門却掃四方之士雲合景從擔簦負篋百里而至戶外之屨常滿于時江南新附諸郡縣學博士官多缺員故國士有譽望者省府常檄以攝教事其有意進趨者莫不奔走焉先生獨不肯屑就專務精思力踐上沂濂洛之原稽經博古啓迪來遊之士

講貫切琢淬礪刮劇俾之從容涵泳以求通貫之功操
存持養以收任重之效於是大有所成就至延祐科興
門人李晉首以先生之學拔萃鄉閭暨五年丁巳李燦
復踵貢擢上第自是終始諸科饒之士如彭圭朱坦鄒
成操琬許道溥皆登門授業者若黃常許憲輩亦私淑
而與有聞焉者也先生之道雖不行於身而殘膏賸馥
沾丐於人亦衆矣先生教人類以孝敬篤實為先不務
葩華以釣名聲其於周易則確守程朱傳義而不惑於

玄虛之論書則備讀諸家而求其疏通知遠之實詩則
要性情之發而驗其興觀羣怨之機禮則審於節文度
數之宜而畧其繁文縟節之末樂則考於蔡氏之書而
求夫聲氣之元春秋則厭夫括例之拘而直探聖人筆
削之旨歷代史籍亦莫不究興衰治亂之由而品其人
才之高下考制度沿革之詳而覈其設施之當否著大
學本末圖說自堯即位甲辰迄周顯德己未貫穿經史
於綱條之內著中庸中和說集朱子論述答問之語審

未發已發之機而探索性情體用之全太極圖通書西
銘則錯綜為之互解諸葛武侯八陣圖則剖析而為之
通釋他著述如周易啓蒙輯錄律呂新書贅述臣鑒圖
孔子世系圖深衣翼感興詩講議古詩訂義閨法贅語
文章源委等書不一又所著碑銘序記詩詞哀誄雜著
名述翁藁者三十卷六經義若干篇藏於家先生天性
至孝二親沒後言及必流涕歔歔年近八旬猶著述翁
說以視子孫惠朋友拳拳焉期以交戒其語率鑿鑿真

實非若世之自好者詡詡誇誕以自媚說也平居恂恂
雅飭然資性勁特豪邁遇事剛果與學徒講議剖析如
流纚纚終日無倦容處兄弟怡怡愉愉待子姪殷以方
州間鄉黨長少貴賤接之各適其宜故得人之歡心方
壯歲舊國貴卿大夫士皆知已莫不愛敬推重暨北來
宦遊至饒者聞名亦皆欽慕景仰焉生宋淳祐己酉二
月沒以大歷戊辰十二月葬里之桑田古峯嶺娶竇氏
繼劉氏俱早卒子二人長雋先卒次傑孫男四人慈元

慈明慈選似孫曾孫男四人泰壯毅正葬之踰年子孫
以門人李紱狀請銘于竹村先生馬公端臨其銘曰易
開三畫史著千年涵而揉之我輩我研書事悉且該矣
而門人操琬更以先生言行輯而為傳尤詳詎意兵火
之後故家凋落遺書往牒散為飛埃毅以手澤之浸微
而典刑之無考將無以垂休光昭來裔而及門之士存
者無幾涕泣語瑤曰曾大父言行子宜有述家藏銘誌
既失不可得若不及今掇拾補綴恐遂耗忘荒落文獻

無徵則為之後者責將焉辭瑤既辭不敏則又念瑤登
先生之門也最後時先生已病足出入以二童輿致三
日始一承顏雖蒙誨誘諄諄語移日不休然服勤日淺
豈能窺測先生之蘊奧猶望孔子之門牆未入其宮者
焉能語其宗廟百官之美也哉獨幸於先生之宗夙有
姻連祖母於先生為從姪女先君子程出也過庭之際
嘗道外家遺事故知其家世淵源而於先生宏範懿德
亦竊知其粗畧用不敢以蕪陋辭嗚呼先生少年高貢

蜚聲監學當其時青紫可俯拾也奈何運去物改竟尼
壯圖既乃韜涵道德闡明經籍作為文章其書載屋俾
後世士類雲蒸俱得以聞聖賢下學上達之要學者修
己治人之方成人有德小子有造居者藉是以涵和毓粹
道積厥躬出者得是以舒翹揚英澤及乎人則先生之道
亦不可謂不行於時矣太上立德其次立言先生於斯
二者其無讓乎顧瑤也何足以知之尚賴同門之士相
與討論訂定庶無遺缺俾得藉手乞言于當世立言君

子以光昭先生之道德垂於不朽斯道幸甚斯文幸甚歲
丁巳七月朔門人許瑤謹述

胡玉齋 方平傳子一桂

汪師泰

胡玉齋方平婺源人曾伯祖昴政和間由辟雍第嘗與
朱韋齋有同邑同年之好曾祖濫紹興初復繼世科因
伯氏交於韋齋獲聞河洛之論而朱子則世好也方平
早受易於介軒董夢程繼師毅齋沈貴瑤沈實介軒上
客而介軒乃盤澗從子得其家傳者盤澗受易於朱子

之門最久方平研精易旨沉潛反覆二十餘年嘗因文
公易本義及啓蒙註通釋一書又外易四卷考象求卦
明數推占又有易餘問記其言曰本義闡象數理義之
原示開物成務之教朱子言易開卷之初先有一重象
數而後易可讀啓蒙四篇其殆明象數以為讀本義而
設者與象非卦不立數非著不行象出於圖書而形於
卦畫則上足以演太極之理而易非淪於無體數衍於
著策而達於變占則下足以濟生人之事而易非荒於

無用其間又多發造化尊陽抑陰之意易之要領孰大
於是明乎此則本義一書如指諸掌也長子一桂字庭
芳生而穎悟好讀書尤精於易景定甲子年十八領鄉
薦試禮部不第退而講學得朱氏源委之正嘗入閩博
訪諸名士以求文公緒論建安熊禾去非方讀書武夷
山中與之上下議論歸則哀集諸家之說疏朱子之言
為易本義附錄纂疏本義啓蒙翼傳其言曰易為卜筮
作也辭以象著占以變推故象有未明則占有未瑩是

故易道有四象為要易學有四占為難朱子啓蒙本義
專主卜筮本義又專以象占示訓蓋皆引而不發待學
者自悟爾去非曰更得詩書春秋周禮儀禮一如易纂
以復六經之舊豈非文公所望於吾輩者乎一桂又為
詩傳附錄纂疏十七史纂人倫事鑒歷代編年諸書並
行于世一桂居之前有二小湖自號雙湖居士遠近師
之號雙湖先生

程山長

若庸傳

洪焱祖

程山長若庸字達原宋端明殿學士秘之從姪咸淳四年陳文龍榜進士從學雙峯饒先生魯又師事穀齋沈先生貴瑤得聞朱子之學淳祐丁未為湖州安定書院山長庚戌馮此山去疾剏臨汝書院于撫州聘若庸為山長置田宅居之咸淳戊辰為福建武夷書院山長若庸累主師席及門之士最盛在新安號勿齋學者稱勿齋先生如范奭金洙吳錫疇皆其高弟在撫州號徽菴以寓不忘桑梓之意學者稱徽菴先生如吳澄程鉅夫

皆其高弟所著有性理字訓講義百篇及太極圖說近

思錄注行于世

臨川吳氏書孟子曰欲貴者人之同心也人人有貴於己者弗思耳此第一節

言人皆欲外物之貴而不知有在我之貴也人之所貴者非良貴也趙孟之所貴趙孟能賤之此第二節言外物之貴不足貴也詩云既醉以酒既飽以德言飽乎仁義也所以不願人之膏粱之味也令聞廣譽施於身所以不願人之文繡也此第三節言人能有在我之貴則自不願外物之貴也願即上文所謂欲也愚嘗聞之曰欲與思皆心之用也外有所慕者謂之欲內有所省者謂之思是欲者用心向外而思者用心向內也大凡人亦無所慕於外矣孟子此章當分為三節而觀之其第一節言人皆欲外物之貴而不知有在我之貴也第二節言外物之貴不足貴也第三節言人能知在我之貴

則自不願乎外物之貴也。內外界限截乎甚嚴。孟子言之所以如是其深切者，正以當世陷溺之深故耳。嗚呼！孟子之時，陷溺之深者，吾不暇論也。居今之世，為今之儒，自其牛角讀書，惟曰：「吾為應舉之文，以取科第之貴而已。」一旦得官，則自謂所學既效，而平生之志願遂一身之能事畢矣。其間見識之頗明，趨向之頗正者，能幾何人哉？蓋愚嘗求一人焉，以與之共學而不可得也。是以私淑於經，而無所師；獨學於家，而無所友。今先生乃推夫子與進，互鄉之心而曉之以義理，愚也伏讀三數不覺惻然有契於心者焉。思欲有言而不知所以為言也。聊誦所聞如此，蓋將演其義而未暇修其辭也。外有私錄二集，乃平日自警之辭。孝經定本一編，又取他書之言，孝者為外傳十篇而編次未畢。皇極經世續書一編，蓋以先天六十四卦分配一元之數，其後復推古今治亂相禪之由，若書與春秋則嘗欲集諸家之善為一家之解，以補先儒之未及，而方發其端，未及竟也。姑以

秦誓一篇隱公一年二年草稿為獻以求有道之正蓋多未定之見固有已覺其非而未暇詮正者幸先生察其所以而終教之

前村程先生

直方傳


董時乂

先生諱直方字道大號前村新安婺源人也幼失怙能自勵讀書嘗十年不下樓務精道德性命之學通諸經尤深于易左圖右史揮斥八極之外蓋無書不讀無物不格嘗一出至京口訪耆德參究講貫歸闕書室扁曰觀易堂與初菴傅先生立為莫逆交盡得邵氏不傳之

秘自鰲轉江空以來閱世雲壑不染指世味之鼎司徒
留無極欲盡取其書入燕不許明年而無極斬于都市
科目未興前十載嘗以張才叔書義兩篇與徐某讀曰
十年後當以此自娛至延祐甲寅而科目聿興凡省院
臺憲行部至婺源者必訪問求見或延至學宮執禮受
教廖氏玄玄集元四卷聲譜仍祝子涇之舊所叶不合
康節先生去譜三板增入本數圖及世之世起數圖算
改謬誤為三卷曰續玄玄集平生著述易則有程氏啓

蒙翼傳四聖一心觀易堂隨筆書則有蔡傳辨疑詩則有學詩筆記春秋則有諸傳考正春秋旁通及前村吟卷虛谷方公亟稱其為人其歿也友人程雲樓為文弔之曰大易之學自伊川翁七分傳作而理始明自康節翁經世書出而數始備先生傍花隨柳之餘駕風鞭霆之暇於是翼啓蒙以探其理之蹟續玄玄以索其數之隱是先生於理數之學重有功也先生生淳祐辛亥之正月歿於泰定乙丑之前正月享年七十有五有四子

焉時又屬在戚末嘗登先生之門而悉傳其所著之書
故述其平生以附邵氏書後



新安文獻志卷七十

欽定四庫全書

集部

新安文獻志卷七十一

詳校官中書臣孫衡

侍讀臣孫球覆勘

總校官庶吉士臣倉聖脉

校對官中書臣吳甸華

謄錄監生臣李大任

欽定四庫全書

新安文獻志卷七十一

明程敏政撰

行實

儒碩

汪古逸先生

炎昶

行狀

趙沔

先生姓汪氏諱炎昶字懋遠自號古逸民學者稱爲古逸先生曾祖冲祖天衢父李安世居新安之婺源新安汪氏繇唐越國公華始顯大中間有道安者自歙州兵馬使充婺源鎮都虞候生銀青光祿大夫檢校太子賓

客兼御史大夫上柱國瀆柱國初自婺源鎮將徙三吳
鎮因家于上邳十里大畝今大畝汪氏皆其後也先生
幼有奇志然短於記誦常以堅苦自勵至忘寢食遂於
書無所不讀鈎深探蹟洞極淵奧雖素號博學者蔑能
加也其學淵源六經得程朱性理之要於言意之表取
朱子論語孟子大學中庸四書采擇羣書發揮微旨每
有得則疏之不汲汲於成書長身脩髯衣冠甚偉動靜
語默進退之間超然不隨流俗巧利鄙詐之士聞其風

而意消見之者莫不恍然如有所失也宋太學生孫公
嵩元京國亡歸隱海寧山中杜門賦詠鍛苦鍊枯淒斷
淪絕以寄其沒世無涯之悲先生早從孫公遊亦善為
詩遂絕意當世婺源有江君凱伯幾者許公月卿之客
也許公者宋名進士國亡歸隱婺源山中制齊衰服之
以居奇江君歸以其女故江君亦不求仕而獨與先生
游江氏所居號雪硯有澗泉林木之勝日與先生徜徉
其間賦詩飲酒上下古今抵掌劇談以相娛樂世或比

之古者山澤列仙之傳以為非今之士也然先生雖老矣猶不廢講學時海寧有陳壽翁先生方居家著書嘗請先生所注四書觀之先生與陳公初不相識即盡送其書陳公所且告之曰平生無他技能惟不護疾忌醫是其所長千萬不必致疑於直言也時先生言近七十猶求益不厭如此陳公每誦其言以勵登門之士先生教人必使循序而進去華務實勿徇虛名於古文章得昔人用意深處每指其律度繩削以示人而戒毋輕作

其自為文奇而有法詩微婉適勁亦時出於悲壯激烈云
先生早喪父事母孝每先事周旋常恐少失母出一言
奉之唯謹家常不足於食然自視無可為者教授之
餘未嘗有所計度或反關不出動十數年然時節必力
致美物珍膳以奉其親雖老不怠太夫人年登九十若忘
家之貧也至元戊寅夏四月先生寢疾呼其子淮琛使
具蔬食菜羹既設整冠起坐稍進飯啜羹置筯謂淮琛
曰事死如事生祭不必豐羹飯之謂也言訖反席正身

歛手晏然而逝是月二十四日也得年七十八歲娶江氏子男三淮琛照乘為弟禹玉後崇金蚤卒女適詹某孫男三藥樹琪樹芳樹先生卒時皆幼所注四書集疏未脫蒙詩文多散逸不存淮琛嘗刻詩五卷於家同郡方公萬里見先生所為詩輒歎曰不意吾州復有此人巴西鄧公善之與孫公有世契憲江東日行部休寧求孫公已捐館因得先生所作賦一篇及他文曰此柳子厚之筆也又有傳先生詩數十篇至江西者蜀郡虞公

伯生見而歎曰此豪傑之士也山林中乃有名作若是者乎其為名流所稱如此新安自朱子後儒學之盛稱天下號東南鄒魯宋亡老儒猶數十人其學一以朱子為宗其議論風旨皆足以師表後來其文采詞華皆足以焜煌一世國初訪祖令星源長卿貳自許公而次如胡公濟鼎吳公遜翁者無不得而友之而滕公山臞方為主簿故家承平時所藏諸公文翰最多訪嘗撫卷慨然以生晚不見前輩為恨及從先生遊然後知先進之士

所以不可及者其立身行己流風遺韻莫不皆有所自云
先生之沒從孫叡與淮琛來謂訪宜狀先生行訪謝曰
嘗聞錄賢者必詳其所終今窆窆之事猶未有期也幸
而克襄其何敢辭後十九年叡始克買地於同里黃荆
山高路之源奉先生柩窆焉而以書來告其事則淮琛
之死已踰一年矣嗚呼以訪之不肖其能知先生所蘊
而稱述之邪若先生卓然上友千古則有不待學者之
言而有不亡者矣姑錄其梗槩如此後有君子尚克表

章之

元故江浙等處儒學提舉程公

榮秀

墓誌銘

陳祖仁

公諱榮秀字孟敷姓程氏世為徽州休寧人程之先有
梁將軍忠壯公靈洗以忠勲賜廟食遂為一郡著姓子
孫散處南北若河南二夫子亦其裔焉忠壯十四世
孫灃唐季為歙州都知兵馬使子南節自歙黃墩徙休
寧陪郭五世孫全宋季為開州團練使駐池州時伊川

先生子端彥避亂州中因相通譜全生先先生永奇又徙邑之小東門永奇生瑜仕為將仕郎瑜生仔仔生伯祥伯祥生圉公所後父也端彥仕為會州司戶叅軍生江州德化丞暘暘生徽州直學謙之與永奇同師考亭謙之生將作監丞源源生宣州倅振孫振孫生志學公所生父也公既貴贈所後父為奉訓大夫中書左司員外郎飛騎尉追封休寧縣男所後母鄭氏為滎陽縣君公生而愿慤不凡有至性事所後父如生己自永奇從學

朱文公子孫以詩書世其業蓋仔從竹洲吳公伯祥從
秋崖方公圉從虛谷方公皆知名一時而公亦以童子
遊虛谷之門宋之迄籙也虛谷以睦州內附將致公仕
版公心薄之力辭去從婺源山屋許公受周易許公奇
之學成而歸以講授為事每自謂伊洛之後從遊考亭
非程朱之書蓋不之好也延祐中學士鄧公文原持憲
江東廉其名以教官舉授建康路明道書院山長公為
教率先行義後課試尤不規規於錢穀有餘即以整漉

洛之書正譌補缺梓本多完學者翕然服其教以累考
合格升平江路儒學錄再調嘉興路儒學教授所教一
如建康而於風勵學者尤力蓋於二邦請部使者復新
范文正公陸宣公之祠訂正其遺書哀集其祀典為景
行錄以傳既而以内艱歸治喪不用浮屠法又以朱氏
禮出文公既沒之後中多未定之論復取文公言行之
有涉於禮者為翼禮以傳服闋除饒之德興簿未赴江
浙行省以遺逸薦於朝授江浙儒學副提舉蒞教之

日芝產於庭當是時吳興趙公裕實貫公方以詞翰妙天下往來浙中公獨不一詣之且語學者曰儒者經史中自有樂地不願汝曹之崇此葩藻也久之提舉闕員以薦進補而公自以年邁乞身舉婺源胡一桂四明程端禮以自代遂得致仕云公之為學一以治心為主所至必揭四箴及敬齋箴於壁以自警居家接物動師古人服食寢處患有常度論當世事利病鑿然可以有為而位不逮德識者惜之諸經子史悉有記錄朱黃所勘動

數百卷多發儒先所未發詩章文字絕不經意然興到有作亦渾厚可傳專工者反不能及屬續之際神氣不亂正襟危坐命筆書謹禮守法四字付子弟而逝春秋七十一歲至順四年十月八日也娶劉氏克相君子封彭城縣君子男一人曰文貴今饒州路德興縣銅冶場提領以卒之年奉公葬邑東程家源久未有銘之者文貴乃以狀託邑士趙君沔來屬予嗚呼若公可謂通經學古之士而無忝其所生者矣銘之為宜銘曰

嵩山巖巖四方所瞻於赫兩賢靈秀攸兼閩海洋洋衆
流所匪匪鴻一儒孰顯其晦有美程公學優行醇發跡
於嵩私淑於閩分誨三庠總教諸路有來諸生一尊槩
度明體適用宜大厥施孰其尼之乃止於斯膺膺高原
獻兆孔吉水擁山環永固玄室彼其之子式此墓門惟
朱之徒惟程之孫

王太古

堃翁

墓誌銘

方回

新安郡婺源王氏其先太原王也吾友堃翁字太古唐

巢寇之亂遠祖自歛黃墩徙縣之武溪修撰愈提刑汝舟大監炎皆此派大監與朱文公冰炭然書解盛行徙上寒徙桐川五世祖字顯道富而好施識架閣汲古周公正妻以女汲古果登第高祖某曾祖某祖某字季武號松川先生好義輕財年九十無疾卒父某娶周氏汲古曾孫女年五十卒再娶董氏太古幼好孫吳說不屑於學弱冠大悟閱經史子集攷制度歷數工詞章詩學韓昌黎晚嗜易許公月卿吳公覺異之先儒論易陽實

陰虛太古註獨謂天氣運地形停陽虛陰實似以述言
自為一家之說與當世無甚合者而堅執其說終身不
變許公月卿嘗為之序如浙東從按察胡公紹開遊介
之江東見御史中丞吳公曼卿或謂中丞已進其易然
終亦不果行年十七喪母號絕年二十八遊郡之黃山館
於蔣氏跨其所愛白驪斃銘而瘞之主賓忘言足迹徧
東南江浙省處以鎮江學正謂此職數十年亦不至執
政棄弗顧而歸大德二年戊戌徙上章半舍許扁曰行

易廣從學者甚夥嘗登上章嶺欲亭之曰東望舊居西
顧新廬酌酒賦詩挾易自娛足矣明年脾疾赴柳城齊
侯英之招授其子易數月又明年庚子秋疾大作八月
生孫以祖孫同庚子名曰後庚謂侍疾者曰後庚既來先
庚可去卒年六十一閏八月十四日也踰月後庚亦卒娶同
郡俞氏孺人先四年卒年六十子祖念出自胡氏弟可
翁女弟恭嫁郡士俞騰龍孫女蕤賓庚池卜辛丑十月
某日葬於上寒與孺人同穴祖念攜行狀至武林回刪其

繁銘之祖念年甫三十一文雅雍容太古家訓於斯見

之銘曰嗚呼太古身今心古止爾終古

王幼鳳續志云王太古號太古

遺民隱居教授書無不讀必推本始尤潛心易學以其
所自得之說述而集之見易篇極卦畫象數之所以然
而皆本於河圖洛書自然之法象其言曰嘗觀於易意
契杳茫見九宮宗五四象數藏象互錯綜離合縱橫濕
燥草木逆相制形以觸萬彙茂往不通則知伏羲畫卦
河圖自放乾先下重奇太陽金生艮坤出水數六太陽
為詳故天多於南川澤注旁崑崙亥地地厚朔方離震
少陰木之子巽坎厥父火少陽故大明未徹陰解雷行
陽破涼風月孕西光是曰先天為易鉅綱又見洛書出
十數五五位得合生成族聚金火變至涼秋炎夏周易
候之男女當柄父母以老遊於野坎降離生中氣遂執
子午左兄司木春生陽初右姊秉金秋殺陰未是取巽

以陰萌恒隨雷允以重剛不違父艮累則坤德媿中土對峙寅中食水寢火消息五行四序順布是曰後天洛書為祖何漢孔臆說亥亥魚魯二劉附和交肆慢悔綿歷千五百歲有如日月弗親我雖顓蒙獨不喻於洛龜河馬於是詘衆說復本文作見易紬聖言證今質古沿委邈原一逆一順體用彪分方圖斜豎同易戶門不顧鬼責人非為易雪寃難志牆屋語妙詞繁爰總厥旨以詔後昆亦足自娛樂何必後世子雲其自序如此既即圖書而詳論人所以取則而畫卦作範之故復攷證洛書已兆於神禹已前且援列禦寇子華子乾鑿度與黃庭經之辭以證劉長民九為圖之說而復明辨孔安國劉向父子班固偽關氏易相承立說之非又有周易分註主於明象以考變占其言曰傳曰易者象也象者像也聖人立象以盡意說易而不以象捕風逐影者也先儒取象拘於說卦殊不知說卦出河內女子所獻與偽秦誓並傳得失相半先師文公曰易本為筮作其言皆

依象數以斷占吉凶愚今放諸經為儀象卦爻取用例
象數大畧可知其取象有取用一畫之儀者有取用二
畫之象者有取三畫之卦及五體積體覆體者有取六
爻之位者傳曰變動不居周流六虛上下無常剛柔相
易不可為典要惟變所適此五體積體覆體所由寓也觸
類而長於易煥然又曰彖辭爻辭各有象占有象無占
占顯於象有占無象象顯於占通變而觀可也其書既
成頗自重時詔命有山林著述者有司具書聞故本府
以先生所註易進朝廷付翰林院國史院校勘其時尚
程朱易說皆駭所聞見吳草廬先生方為胄監師見而
說之故所註易纂言多采其說休寧朱端叔先生曰王先
生之學可謂前無古人者矣兵革後雖子孫亦不能知
其說

定宇陳先生

櫟

墓誌銘

揭傒斯

聖人之學至於新安子朱子廣大悉備朱子既沒天下
學士羣起著書一得一失各立門戶爭奇取異附會繳
繞使朱子之說翳然以昏然朱子沒五十有三年而陳
先生櫟生於新安生三歲祖母吳夫人授孝經論語
聞輒成誦五歲入小學即涉獵經史七歲通進士業十
五為人師二十三而宋亡科舉廢慨然發憤聖人之學
涵濡玩索廢寢忘食貫穿古今網羅百氏以有功於聖
人莫盛於朱子懼諸家之說亂朱子本真乃著四書發

明書傳纂疏禮記集義等書餘數十萬言其畔朱子者刊而去之其微辭隱義引而伸之其所未備補而益之於是朱子之學煥然以明方是時唯江西吳先生澄以經學自任善著書獨稱陳先生有功朱子凡江東人來受學者盡送而歸之陳先生然吳先生多居通都大邑又數登用于朝天下學者四面而歸之故其學遠而彰尊而明陳先生居萬山間與木石為伍不出門戶動數十年故其學必待其書之行天下乃能知之及其行也

亦莫之禦先生可謂豪傑之士矣先生字壽翁其所居堂曰定宇之堂其自稱曰東阜老人唐之季其先有諱禧者自桐廬辟地新安居休寧之西三十里藤溪之上世多通人顯士今姓其里曰陳村云曾大父諱伯全大父諱慶大父諱源長以春秋教授先生孝友剛正動中禮度不以勢合不以利交四方來學諄諄善誘延祐賓興有司逼迫就試既與貢當赴春官稱疾固辭其學大抵以朱子為歸其所嚴事曰黃常甫先生所與游曰方

公回曹公涇以元統三年甲戌二月十有四日年八十
三卒後五日配朱氏七十九亦卒皆無疾其卒也即初
昏之月又以是月癸未合葬所居之後先塋朱氏有賢
行家政無鉅細皆身理之不以勤先生先生得專力於
學亦其配之助也子男二照勲孫男三埜圻基勲圻先
卒女一嫁程怡曾孫男一鑒明年其孤以其父之執汪
君炎昶所為狀介其門人朱槃請銘銘曰

先生之學既博而約先生之行既專而靜不為利疚不

為名高杜門空山與道遊遨其書孔富其後孔茂八袞
非壽與天地久

胡雲峯

炳文

傳

汪幼鳳

胡雲峯炳文字仲虎婺源人父斗元傳易學於前進士
朱洪範日玩一爻七日通玩一卦周而復始授徒五十
年嘗謂乾專言善性也坤兼言善不善性情也乾之善
世吾無及已坤之積善吾庶幾勉之自號勉齋卒門人
俞洪等私謚曰孝善先生炳文幼嗜學年十二夜讀不輟

父母恐其成疾欲止之乃以衣蔽窓隙終夜默誦既長
篤志朱子之學上邈伊洛凡諸子百氏陰陽醫卜星歷術
數靡不推究四方學者雲集嘗為信州道一書院山長其
族子浚為建明經書院以館四方來學之士炳文歸署
山長為課試以訓諸生成材者多再調蘭溪州學正不
赴卒炳文集諸說叅正作易本義通釋而於朱子所注
四書用力尤深餘干饒魯之學本出於朱子而其為說
多與朱子抵牾炳文深正其非作四書通凡辭異而理

同者合而一之辭同而意殊者析而辨之往往發其未
盡之蘊於性理三書朱子啓蒙易五贊皆有通釋行世
春秋嘗為集解禮書皆有纂述自以更易未定門人亦
有得其蒙者又有大學指掌圖四書辨疑五經會意純
正蒙求爾雅韻語雲峯筆記講議二百篇文集二十
卷東南學者因其所自號稱雲峯先生

畏齋程先生

端禮

墓誌銘

黃潛

先生諱端禮字敬叔姓程氏其先遠有世序而譜牒莫

詳所可見者漢有海西令曾唐有太子左衛率府曹曹

參軍其自番禺徙家于鄞則自曹曹之大父珍始故今為

慶元之鄞縣人

按忠壯十二世孫纂纂四世孫煜煜生承恭承恭生公曾公曾生珍珍六世孫

良弼生振父振父生在孫在孫生立立之子即畏齋兄弟也作誌者見公曾之名誤以漢海西令曾歸之上下

懸絕舛之甚矣

歷五代至宋仕者恒弗絕曾祖振父承務郎平

江府百萬倉司門祖在孫通直郎知平江府常熟縣事

父立鄉貢進士入皇朝贈從仕郎郊祀署丞母王氏曹

氏竝封宜人先生則徐氏出也初用舉者為廣德之建

平池之建德兩縣儒學教諭歷信之稼軒建康之江東
兩書院山長用累考及格上名中書授鉛山州儒學學
正秩滿遂以將仕佐郎台州路儒學教授致仕其在建平
興舉廢墜諸生之貧者必周給之縣尹王君起宗率僚
吏聽其論說且築室赤巖上命其子楚鼈受學焉楚鼈
後出入臺閣卒為時之名人繼王君為其縣者復倡好
事之家為買書萬卷覆以傑閣永康胡先生長孺記之
其在建德增學舍以居其徒盡復民所占田其始至也

有田三百畝比受代而去有田一千畝稼軒前賢遺跡
多為人所據悉按其籍奪而歸之江東新界院額臺府
令有司選辟以開教事學者翕然知所宗仰文宗在潛
邸遣近侍子弟來學賜以金幣牢醴禮遇甚至於鉛山
則新其廟學豪家築屋侵入宮牆久莫能正先生白於
部使者命毀其屋乃懼而請以腴田二十畝易之鵞
湖書院之旁有道觀先生偶至其處有驢跑堂前隙地
驅去復來先生默卜之曰地下果有物驢當復至已而

驢果來跑益力乃訪觀主求發之得石碣十餘刻羣賢像乃為作羣賢堂先是平章政事趙魯公及王御史理嘗舉先生可教國子趙御史承禧舉先生可提舉儒學俱不報先生歸後郡守王侯允恭踵門禮請先生為學者師帥閫及旁郡講行鄉飲酒禮皆俟先生討論而後定郡故有宋丞相史越王所置義廩以助仕族儒流昏喪之不給自先生為之督視貧者始實受其惠先生素所厚一二達官魁士相繼凋謝先生若有所不樂一日拏

舟遊東湖諸生載酒追及之飲於中流酒半酣指所卜
葬地曰若豈知我之歸於斯不久也邪學問之道具在
聖經賢傳讀之有法吾嘗述之矣真知實踐則存乎其
人懋之哉諸生為之默然各奉觴為壽而歸自是多以
病不出久之病加劇客有將上京師者過而言別相與
論宋季事娓娓不倦既正冠送客顏色忽變痰氣作醫
者以丹劑進先生却之曰不敢服也目已瞑頭微偏門
人樂良進曰先生頭容稍偏矣復張目端坐而逝至正五

年夏六月甲子也享年七十有五以六年正月葬縣東陽堂鄉之陶壘娶潘氏潘為建平望族先生主教事時慕其賢而以女歸之卒因葬於建平至是奉遷而合祔焉子男一人衍女四人孫男一人循理女三人蓋宋季之士率務以記誦辭章為資身取寵之具而言道學者亦莫盛於此時四明之學祖陸氏而宗楊袁其言朱子之學者自黃氏震史氏蒙鄉始繼朱子之學者自晏氏淵大陽先生枋小陽先生岳以至於史氏而先生承之黃

氏主於躬行而史氏務明體以達用先生素有志於當世惜其仕不大顯故平生蘊蓄未克究於設施而私淑諸人者不為無功於名教也故禮部郎中韓公居仁嘗學於小陽先生其仕於先生之鄉與先生論議無不脗合行省數聘先生較文鄉闈先生以為國朝設科初意專取朱子貢舉私議今多違之若往宜不合力辭不赴其源流本末可概見也先生色莊而氣夷善誘學者使之日改月化而仲氏太史公端學動有師法學者以其剛明

尤嚴憚之人以比河南程氏兩夫子云先生所著有讀書日程若干卷國子監既頒於郡縣學使以為學法中書復以聞而申救之使遵行焉詩文有畏齋集若干卷藏於家先生薨後二年門人徐仁文等若干相與議持宣文閣授經郎危素之狀來謁銘潛幸嘗辱交於先生徵於狀無不合乃併以平昔所知者論次而銘之銘曰

大道孔夷聖賢同趨政龐俗裂師異指殊真儒有作乃發其部先生之傳厥有端緒靡亟靡徐蹈夫大中居之

以寬休休有容視其所履制於學法四方訓之著於令
甲志局於位厥施未豐惟其教思垂於無窮門人謁辭
論撰遺德畀于方來永有矜式

積齋程君

端學

墓誌銘

歐陽玄

程君時叔既卒之二十年子徐來請其墓銘君端學其
諱時叔其字號積齋程氏系出廣平唐以來家鄱陽君
先世有府君諱珍自鄱陽遷四明之鄞其孫仕為唐文
林郎衛率府曹參軍杜工部有詩送程率府歸四明

是也至宋代有聞人曾祖振父承務郎平江府百萬倉司門妣余氏祖在孫通直郎知平江府常熟縣事妣卓氏父立年十八為鄉貢五經都魁內附後當道累薦入仕不就今以子貴贈從仕郎郊祀署丞妣王氏曹氏竝封宜人至治癸亥予以鳩茲宰淞省聘為秋闈試官第二場四靈賦本房得一卷愛其詞氣高迥擬真選中覆考官謂非賦體欲黜之予爭之力且曰其人賦場如此經義必高手畫三不成字號督掌卷官對號參索取其

本經觀之至則偉然老成筆也主司是予言乃與選予
默識是卷及拆號同列秦郵龔璠子敬素知君姓名謂
予曰此四明處士程敬叔先生之弟時叔也微君言幾
失此佳士明年君會試中高等榜名傳至江南予自喜
鄉者之識鑒不冬烘矣此予始得吾時叔於程文者也
泰定乙丑予以武攸宰被召為國子博士時叔已擢為
國子助教上日與同僚史駟孫車甫以門生禮見駟亦
予所得士也予辭之不獲禮畢然後同升教席旁觀者

題之予自是託交時叔見其心與貌俱古文與行俱卓
會國學改積分例為升齋等第助予議甚多諸生講授
稍暇即以所作春秋本義就予討論蓋君之精神心術
盡萃是書朝夕刪改不已寢食為廢嘗語之曰昔者杜
元凱有左傳癖君有春秋癖邪未幾車甫以劬書致疾
卒君亦頗頗癯瘁多病予每以是諷之其勤勩自若此
予繼得吾時叔於學行者也後至元丙子予以國子祭
酒謁告南歸假道於筠君為筠州幕長卒已二年矣筠

州之長貳僚佐及邦之士友來見予者予必詢時叔咸
謂君為政廉靜而明達初至吏以為儒者恐不習吏事
君熟於章程暢於事宜已而老吏健胥拱手以服太守
僧嘉訥甚賢凡事取決於君及沒素服哭之慟仰天呼
曰正人云亡吾何恃乎即日移文告老而去夫能使長
官眎其存亡為去留君之能官亦可知矣此予未得吾
時叔於吏治者也宋乾淳間朱陸之學竝出四明學者
多宗陸氏唯黃氏震史氏蒙卿獨宗朱氏君與伯氏端

禮敬叔師史先生盡得朱子明體達用之指於是二難
自為師友平居一舉動必合禮法時人以其方嚴剛正
以二程目之敬叔發明朱子之法有讀書工程若干卷
國子監取其書頒示四方郡縣教官以式學者後中書
以聞復申飭之君先與里中同志孫君友仁慨念春秋
在諸經中獨未有歸一之說徧索前代說春秋者凡百
三十家折衷異同續作春秋記由是沈潛紬繹二十餘
年乃作春秋本義三十卷三傳辨疑二十卷或問十卷

以經筵官申請有司取其書鉅梓傳世君早歲不屑為
舉子業朋友力勸之就試及再戰再捷素習者不能過
之會試經義策冠場試官為驚歎曰於宰相曰此卷非
三十年學問不能成使舉子得挾書入場屋寸晷之下
未必能作請置通榜第一後格於舊制以冠南士置第
二名初調僊居縣丞未行尋改授國子助教時隱士張
臨慎與為司業君與助教王瓚在中與張論文不合當
道入張言君與瓚未及考即注代平章烏公素聞二公

有學傳諭天官特視考論升轉君與瓚偕予從仕郎翰林國史院編修官君在翰林論撰每為學士雍郡虞公伯生所推服中書選考隨處鄉試號稱得人國子生賀據德李哲嘗親受經於君後皆為南宮第一人君長筠幕未久朝廷擬為太常博士命將下終於位今以子貴贈奉訓大夫禮部郎中飛騎尉追封鄞縣男娶余氏宋叅政珍之曾孫先卒贈宜人進封鄞縣君繼周氏宋進士應龍之孫女封恭人進封縣君子男四人復以廕數

調為江淞行省理問所知事次徐由翰林從事發身太
史院校書郎遷奉禮郎選為中書東曹掾從太師丞相
軍徐擢禮部主事改刑部戶部主事升中書檢校官拜
監察御史升本臺都事以才諳稱於時次賚國子生能
文章胄館有聲蚤世次衛林州書院山長女一適同里
樂旭孫男四人孚國學生式鄞縣教諭謙誠曾孫二人
祖伊俱幼君生以前至元十五年戊寅五月丁未卒以
元統二年甲戌十一月癸卯年五十有七以次年閏十

二月乙酉葬於邑之陽堂鄉太白里之原余氏自青山遷
合葬焉君壽不滿德位不酬能餘慶所被在其後人為
宜然予兩知貢舉兩考會試又嘗屢考國學公試及大
都各行省鄉試得士亡慮數百人其間為名公卿立事
功者不少然求通經學古之士如吾時叔者甚難其人
焉得之難故察之審言之詳也歟銘曰

生於鄆沒於筠儒之醇吏之循抱魯麟至終身嗚呼我
元之獻民百世之端人素王氏之忠臣

故海鹽州教授程君

逢午

墓誌銘

鄧文原

大德七年新安程君信叔卒後六年而葬其子願學留
京師以狀來請曰先人力學勵行生不獲展用於時歿
而無紀述以貽不朽非所以承先志且重不孝罪惟先
生哀而賜之銘按程氏世居廣平東晉時有諱元譚者
為鎮東軍謀湘州刺史出守新安因家焉至十三世孫
靈洗仕梁有功沒謚忠壯公廟食其土又十三世孫灃

仕唐為檢校御史中丞居休寧之汭口於君為十二世祖君之父諱自得隱德不耀母俞氏生子五人君於次居中幼穎悟喜讀書長習舉子業探索理奧難斐浮靡魁儒碩彥多折輩行與交宋寶祐咸淳中兩舉進士不第識者為誚有司而君泊然不以得失為愠喜務學益精深至元丙子文軌混一杜門以詩書教子不復有祿仕意元貞丙申郡侯以君薦之行省遂版授紫陽書院山長紫陽朱先生之鄉君生猶及接識諸老習聞緒論

朝訂暮考得其指歸既至則為諸生紬繹中庸輯為講義三卷凡十八閱月而成書郡以其文可傳命書院鈐梓其說本之朱先生而言外不傳之妙則心得之也秩滿授海鹽州儒學教授未赴以疾卒享年六十有七君諱逢午信叔其字娶俞氏再娶吳氏男二人長即願學次幼學也女三人始予客錢塘李君公略以照磨居省幕信叔館公略所予時時過公略則見信叔手書不輟與之論議古今上下纚纚可聽予嘗曰今之任師道者

得如信叔其庶幾乎公略亦每為予稱其賢今君與公略相繼死而予志其墓悲夫願學痛其父連蹇以卒常思奮迅以亢宗信叔為不亡矣墓在休寧縣和睦鄉上山林祖墓之傍葬以大德戊申正月七日銘曰

嗚呼信叔士孳孳以徇名子不競也或矯矯以立異子常厥性也窮丹鉛以皓首傷哉命也銘貞石以詔方來尚子孫之慶也

倪仲弘先生

士毅

改葬誌

趙 沔

新安有賢行君子曰倪仲弘先生以其學教授於黟二十有三年既沒而家貧不能葬逾四年乃克返葬於休寧故里赤丘之原地下濕欲更諸爽塏力未能也黟人思先生之德久而不忘門人汪志道其弟存心相與謀曰先生設教吾邑遂留家焉蓋所謂沒而可祭於社者吾里西北黃坑有善地請改葬先生於此以係邑人之思可乎其孤聞之謙不敢當又二年為至正十四年冬十有二月邑令永嘉周侯希濂赴官饒州道過汪氏之

居聞其言而嘆美之曰吾於此得以知先生之賢且以弟子之地而葬其師義無不可者卽日命志道存心以已意為書授先生家又命諸孤急諏日營葬而後去於是遂以今年己未正月癸酉改葬先生於黟南坑余思塢之原從黟人之志也先生守身制行不為名高而事親至孝接物以誠非其人不交非其有不取非仁義道德之說嘗論定於郡先師朱子者不以教人凡污苟賤之事不接於身利害得失揣摩計較之辭不挂於口雖

大寒暑未嘗一日輟其業以嬉終其身人不見疾言遽色是故黥人信其言而尊其行既沒而復思之倪氏世家休寧至先生而益貧無以為生居常授徒以養黥人汪君泰初聞其賢而敬禮之築室下阜里中請先生奉二親來居躬率子弟為邑人問學焉志道存心皆其子也先生諱士毅仲弘其字曾祖機祖文虎考良弼皆以文學教授其師曰陳壽翁先生亦休寧人所注書曰四書輯釋閩坊購其初藁刻之嘗別為纂釋之例甚精書未

脫藁又將以次及他經皆未就而卒其卒以戊子歲四月九日年四十有六娶吳氏子男四人尚絅尚德尚誼尚禮尚絅後汪氏尚誼為從父士安子女嫁徐顯孫男銓女幼始先生居父喪未終而感疾不起又三年而太夫人與吳氏相繼卒故黔人尤哀之葬之日凡為先生之賓友與門生弟子皆切感黔人之知義周侯之樂善而先生身教之道益彰也既葬乃謀買石刻文墓次以泐自幼為先生所知又號為能知先生者則授筆焉泐

閱戰國秦漢以來大道既隱而忠信孝友醇厚士未嘗無也聖學復明於近代士始以知道為宗久之又失其傳而學者益以空言自蔽由是高節卓行鮮復見稱於時則民偽滋而世變極矣若吾仲弘者何可得哉姑因志改葬略著其為人如此使君子有所考焉

程教授復心傳

汪幼鳳

程教授復心字子見婺源人號林隱性敏悟敦厚自幼嗜書師朱文公從孫洪範而友雲峯胡炳文中年益篤

學力行嘗取文公四書集註會黃氏輔氏衆說而折衷之分章為圖間附己意積三十餘年始成名曰四書章圖及取語錄諸書辨證同異增損詳略著纂釋二十卷發明濂洛諸儒未盡之旨有功後學元至大戊申浙江儒學提舉司言於行省皇慶癸丑行省進于朝翰林史院考訂其書率皆稱贊學士趙孟頫請置諸館閣闡明大典而平章李道復難之乃議於江南諸路教授中擢用復心年將六十以親老固辭特授徽州路儒學教授致

仕給半俸終其身名士大夫如方回程鉅夫王約元明
善鄧文原虞集楊載范德機諸公俱有製作盛稱之至

元六年庚辰十二月十八日卒壽八十四學者稱林隱

先生

江浙行省繳申程復心四書章圖咨文皇帝聖旨諭江浙等處行中書省據江浙等處儒學提舉司申

據杭州路儒學申據耆宿儒人趙與虎等狀呈切見徽州路婺源州儒人程復心生同朱子之鄉早佩先儒之訓嘗取大學中庸章句及論語孟子集註分章析義各布為圖又於纂疏語錄諸書辨證同異增損詳畧著纂釋二十餘卷發明修齊治平要旨彪分臚列粲然可觀誠有補於後學似此著書之功良可嘉尚呈乞照詳得此卑學今將本人所著文字繳連前去申乞照詳施行得此又准松江府知事邵從仕牒呈切見徽州路老儒

程復心年將六袞學貫四書樂道安貧久擅老成之譽修身謹行端為茂異之才本儒生居朱文公故里曾將文公四書分章為圖開析言意本末終始精粗畢備纂然可觀又取纂疏語錄等書參訂異同增損詳畧編註纂釋二十餘卷凡用工二三十年始成全書其間如大學言心而不言性中庸言性而不言心論語專言仁孟子專言義等語皆發明濬洛諸儒未盡之蘊誠有功於後學前建德路總管方虛谷及前浙東海右道廉訪副使臧魯山先生俱有序跋深加贊賞本儒苦心著書才德俱美不求仕進若不舉明豈不有負朝廷崇儒重道之意如蒙准保備申上司依例優加擢用庶免遺材准此考校得程復心所著四書發明蘊奧開悟學者用意精覈誠有可嘉今將程復心所著文字繳連前去申乞照驗事得此本省今將程復心所著文字隨咨前去咨請照詳施行

王伯武先生傳

汪幼鳳

王伯武名偁號絕儕早歲穎悟師事胡雲峰炳文考明譜系作惇叙圖其族兄懋伯以八世祖墓地久為富家產莫能復伯父以已田易而歸之博極羣書凡天文歷法象數江河海島山經地誌源委次第今古州郡地域疆理之異同禮樂名物度數之詳略三代漢唐歷代制度儀文旦夕討論圖象具列義疏備陳折衷以先儒之論而發其所未詳補其所未備積之既久卷帙繁夥約之

則以關於天者曰天象考麗於地者坤象考於朱子儀
禮經傳通釋分類精究考論端緒而次集之傍至於陰
陽醫藥百家衆技莫不悉載凡廿餘冊總題之曰格物
編壬辰皆毀於兵休寧朱升素號該博凡制度疑難不
通者必戒其徒記之曰將以問伯武其推尊於當時者
如此弟與字仲全自號容安散人刻厲清苦身踐力到
卒有所就鄉里稱為二難

新安文獻志卷七十一

欽定四庫全書

新安文獻志卷七十二

明程敏政撰

行實

儒碩

東山趙先生

汾

行狀

詹烜

先生諱汾字子常姓趙氏其先隴西人唐中和間有諱
思者避地新安海寧之龍源里八世孫曰安慶時方寇
亂率義民勦平之事聞授西隅總管安慶生光祖為宋
京庠學官歲大祲出廩賑貧提刑汪文振嘗銘其墓二

子次曰大振淮東漕司總管大振二子長夢營將仕郎
夢營二子長彌孝浦江稅官彌孝子象元號可齋才識
超異元平江南徽旣下隣邑有持兵未服者將加屠戮
可齋盡發私藏詣軍門請而屠戮不行由是貳令休寧
遷婺源丞改授信州司獄以疾辭旣而朝京授杭州仁
和令未至卒於揚州二子幼曰克明號松莊孝友敦厚
鄉稱善人實先生之考也娶同邑汪氏生五男二女先
生最幼初夫人夢飛鳥自齊雲巖來集於懷覺有娠明

年延祐六年己未三月癸亥先生生焉資稟卓絕自孩
抱聞讀書輒能成誦及就外傳讀朱子四書疑難不一
師告以初學毋過求意輒不釋夜歸取文公大全集語
錄等書繙閱五鼓始休由是有悟遂厲志聖賢之學不
事舉子業少長遍詣郡之師儒遂有負笈四方之思嚮
恒產以為裹糧執贄之具親友或議其非弗顧聞九江
黃楚望先生杜門著述歲丁丑往拜之先生窮經以積思
自悟為主故其教人引而不發使其自思一再登門乃得

授六經疑義千餘條以歸辛巳秋復往留二歲得口授
六十四卦義與學春秋之要過嚴陵請益於夏先生大
之問易象春秋書法如何先生以所聞於黃先生者對
夏先生嘆以徒費心力為戒因出示其家傳先天易書
曰此義易一大象也繼如杭謁黃文獻公於官署公以
師道自居不少借辭色及誦所進書大異之待以殊禮
甲申失怙卒喪謁翰林虞公於臨川授館於家一歲其
所上書曰聖賢之道大矣學者可不知其要乎嘗聞之

吾之至尊至貴舉天下之物不足以加之者此心是也
吾之至親至切舉天下之學不足以先之者求放心之
謂也然非真有所見無以為日用常行之地非真有所
得無以為造詣歸宿之極所謂為學之要者庶幾在此
此沆之所以日夜憂懼以求聞乎先覺之訓而未之有
得者也然沆之幼也聞江西有吳先生焉行修道立為
世表儀而成已誨人深悲空言之無益及觀閣下所為
行狀而知先生為學之方矣伏惟閣下察其有志以其

所得於先生者而賜教焉俾於入德之門不致迷其所趨而天之所以與我至尊至貴可以反身而有得則閣下之賜大矣時江西憲試請題虞公擬策問江右先賢及朱陸二氏立教所以異同具對卒言劉侍讀有功聖經至論朱陸二子入德之門尤為精切詳備末乃舉朱子曰子靜所說專是尊德性而熹平日所論却是道問學上多了今當反身用力去短集長庶不墮於一偏也又舉陸子曰追惟曩昔粗心浮氣徒致參辰豈足酬議

以二說為證使其合併於暮歲微言精義必有契焉子
靜則已往矣虞公評其後曰予常生朱子之鄉而得陸
氏之說於二家之所以成已教人反覆究竟明白蓋素
用力斯事者非綴緝傳會之比也厥後再往公愈加敬
異及疾革先生適在左右凡喪事損益皆以為託諸子
請先生狀其行歲丙戌再遊九江則黃先生已捐館矣有
袁誠夫者文正公高第緝師說為四書日錄旨意與朱子
多殊請商訂先生為條別是非數萬言袁公心服多所

更定趙郡蘇公伯修虞公之徒也為浙省叅政與先生友善比入守邦畿要同往以母老辭歸名其居曰東山精舍虞公嘗為之記舉先生之言曰汭蚤歲學於鄉求程朱緒餘誦習經訓辨釋其文義之外無所致力焉誠恐終身不足知至畢世不能意誠古昔聖賢師弟子之授受如斯而已乎切嘗思之以求塗轍之正至於道南之歎而有感焉蓋其屬之龜山者必有所在而豫章延平所以授之朱子者亦非有他道也不然羅李二公無

事業以見於時無文采以垂於後其所學者何學所事者何事而吾朱子所謂潛思力行任重詣極者亦將何所指乎此精舍之作所以願盡心焉者也其於大學則謂三綱舉聖人事為大學標準八目乃教學者用力之方故明明德新民傳中無學者工夫而修身傳中無聖人氣象其舉古之欲明明德於天下者而逆推其用力之序則明古之聖人亦必由學而至而學者之功必可至於聖人又以為格物是窮盡物理程子所謂講明義理

分別是非之類是也致知是程子所謂明諸心又云潛心默識玩索久之庶幾自得之類是也二事不可合為一惟程子言之甚明若曰致知在格物在字之義不同遂疑格致分而為二則傳中言齊家在修身修身在正心謂二者合為一可乎且聞明道先生謂學者若無事可行且去靜坐之言而伊川先生每見人靜坐輒嘆其善學及朱子得於羅李二公所相授亦必危坐終日以驗夫喜怒哀樂未發之前氣象為如何而求其所謂中

者久之而知天下之大本為有在乎是也由是雞初鳴則起澄心默坐涵養本源以為致思之地而後凡所得於師之指及文字奧義有未通者必用向上工夫以求之於是造詣精深而一旦豁然矣蓋雖雅志不苟於仕而身則優為當四方擾攘嘗論為國家者不能舉天下大勢以定攻守之宜而所在浪戰不求智勇之士真可任將兵者使臺省貴人郡縣俗吏共軍旅之權仗行省討亂御史臺督視如平時而誅求劫奪之弊反覆壞爛之

由朝廷終無自知之兵財兩匱郡邑一切以矯假病民而上官方且守故常不知通變長久之道賞罰不明故是非淆亂而治安撥亂之術行軍克敵之方皆廢不講徒欲以歲月削平安可得哉大率近歲用兵之失不越斯言而先生經濟之才亦可見矣自精舍成四方學者尊之為東山先生云壬辰兵興先生奉母夫人避地盡心調護及郡邑繼復而夫人以天年終丙申天兵克定郡邑其主將慕先生名德禮羅不至丁酉寓於衢之柯

山已亥結茅於星溪之古閭山山深閭寥人事幾絕潛
心著述雖當顛沛流離而進修之功不少輟壬寅春歸東
山時明室初興創業金陵吾邑已附屬六年矣有司屢
奉命徵辟繼以議禮召皆以得疾辭己酉起山林遺士
共修元史先生在召中暨竣事得請還未幾疾復作十
有一月丙申而先生捐世矣得年僅五十有一於戲痛哉
配同邑程氏女二人長適汪璫次適蘇旼男一人夢吉甫
入學側室朱氏所出也先生孝養二親出乎天性居喪

哀毀過禮事諸兄備盡敬友撫幼以慈三兄歿於他鄉諸子不能為喪具先生奉柩歸葬從兄子弼有遺孤先生撫之成立當賦歛繁重之際俾能保其恒產吳氏甥失其恃怙無所依為之收養若此者在先生皆所優為有不能殫述者新安自朱子後儒學之盛四方稱之為東南鄒魯然其末流或以辨析之義纂輯羣言即為朱子之學先生獨超然有見於聖賢之授受不徒在於推究文義之間故其讀書一切以實理求之反而驗之於已

非有以信其必然不已當時鄉先生皆留心著述所以
羽翼程朱之教者具有成書先生受而讀之猶謂未知
為學之要常曰讀書最患多疑每展卷則羣疑競起如
蠅毛要須得程朱復作面命之而後可釋然爾是以質
諸師而不得者卒求之程朱遺言而有見焉其於窮經
之要則有得於黃先生而推極之其初見黃先生問年
答曰己未黃先生曰先吾刊六經補註之歲也或曰書
刊矣恐無讀者予曰當是讀者未生耳豈知吾子適生

是歲邪然春秋託始之歲亦己未也斯文緣契實在斯
乎先生請問窮經之要惟告以在乎致思問致思之道
乃舉一事為例禮曰女有五不娶其一為喪父長子先
儒以喪父無兄者當之如使其言已然則喪父無兄之
子何罪見絕於人如此先生思之久而後得其說曰此
蓋宋桓夫人許穆夫人之類爾故古註言無所受命猶未
失也若喪父而無兄則期功之親皆得為主矣黃先
生大稱善遂授以求春秋書法曰楚殺其大夫得臣此

書法也當求之二百四十二年之內夫人姜氏如齊師
此書法也當求之二百四十二年之外既又為易置其
語曰楚殺其大夫得臣此書法也當求之二百四十二
年之外夫人姜氏如齊師此書法也當求之二百四十
二年之內先生受其說退而思之久乃悟其意則二百
四十二年之外者魯史書法二百四十二年之內者聖人
書法也黃先生各以二義貫一理之旨以為單傳密付
悉在於斯先生即黃先生六經補註等書取凡為春秋

說者叅以耳聞類萃為春秋師說三卷復因其意為春秋集傳十五卷既而求之於經終有未盡聖人之意因思戴記經解有曰屬辭比事春秋之教也始悟是經全以一筆一削見義苟不屬辭比事考其異同之故以求之未有得其說者蓋左氏與杜註有得於魯史遺法主史以釋經而不知有筆削之法至若公穀啖趙陳氏俱有屬辭遺意則知求筆削之旨而不知先考魯史之舊文二者各得一偏不能無弊合而求之具見得失由是

不傳之旨煥然復明每謂非黃先生教以先考史法而後經義可求則不得其門而入也及重改集傳越四載始克成編復思是經倫類區別為義至精叅互錯綜易相矛盾苟不推類以通之豈無遺憾遂著春秋屬辭八篇雖萬變不齊始終各有條理於是一經本旨方完每謂苦思之功若有神助聖人復起不易吾言又以為春秋必考左傳事實為先杜元凱陳君舉皆有得於此而各有所蔽因著左氏補註十卷吾鄉風林先生亦以窮

經為務而莫肯雷同一見是書輒曰前無古人春秋之
旨論定於此矣時駙馬都尉和陽王公鎮徽以春秋屬
辭師說左氏補註下商山義塾刻梓以廣其傳然屬辭
詳著筆削之權集傳乃明經世之志必二書相表裏而後
經旨無所遺迨屬辭成書復改集傳使歸於至昭二十
七年而賁志以歿門人倪尚誼證以屬辭義例質之以
平日所聞於先生者叅互考據足成之若尚誼亦可謂
有功於先生之門矣其於易經則聞諸黃先生必須明

象又曰易象與春秋書法廢失之由大畧相同苟通其一則可以觸機而悟矣先生春秋本旨既明於易寤寐不忘致思每有所悟則喟然曰黃先生豈欺我哉嘗曰春秋文義賴孟子之言而後有據於周易亦必見其說如孟子之論春秋者而後聖人之情可得而推焉先生常作序卦圖說及經文開端乾坤屯三卦解大畧以為義皇設卦繫辭名之曰易繫辭傳上篇所贊皆其事也神農黃帝氏繼作各因義皇之易別定卦序自為一代

之書迨夏而商其辭則世有增益蓋無不備皆為占筮之用連山歸藏是也至周文王以至德而不免美里之難乃本羲皇之易因其交易對待反易相因之象定於上下二篇以天地之道明君臣之義因陰陽消長盈虛之變以著人事進退存亡之戒其辭之所繫必有關於此者取之而非聖人一時自為是言也迨周公相成王二叔流言召公不悅亦有感於先王憂患故乃即卦爻象象取其愛惡遠近相攻相取之情作為爻辭與先王之

書相表裏以其制作之旨視連山歸藏少異題曰周易
其書與二易俱掌於太史占筮家得通用之而義則不
專主於占筮孔子曰易之興也其當殷之末世周之盛
德邪當文王與紂之事邪是故其辭危危者使平易者
使傾其道甚大百物不廢懼以始終其要無咎此周易
之本義蓋先生所求論周易本旨如孟子之論春秋者
卒有得於夫子斯言而不假乎他求也詩五言初學六
朝後改習建安諸子及老杜近體則學乎唐人其為文

曰必以理勝為主然後命意遣辭則沛然矣烜竊觀先生之學以積思為本領以自悟為歸宿勉夫切已向上之工夫而至乎窮經復古之成效豈偶然哉烜自獲交先生不以疎謬進而教之往來請益遂得聞窮經之要及春秋筆削之旨自悔其前學之非而惜聞道之晚也方期以晚年相與講授周易象學而先生遽已謝世矣何後學之不幸也抑斯文廢興關於天運非人所得測識歟尚誼偕其子夢吉屬烜為狀烜末學膚淺何足以

知先生哉然受知最厚義不容辭姑述所見聞如右碩
學君子尚表章之俾垂永久非惟先生九京有光實亦
斯文之幸也諸生星源詹烜謹狀

環谷汪先生

克寬

行狀

吳國英

先生諱克寬字德輔一字仲裕汪其姓也上世自歙縣
之黃墩遷於祁門縣北之石山至諱釗徙居縣南之韓
溪五傳有兄弟七人竝有才名其第五子世容生深深生
敏敏生黻黻生二子長若思無子以弟若谷子僑為嗣僑

補試中國學進士生晬晬生燦字明夫繼家學時羣從
昆弟為諸經講師學問文章槩範鄉邑從弟國學進士東
山府君華字榮夫嘗與其族兄二教府君相字魏夫學於雙
峯饒子之門饒乃勉齋先生黃文肅公高第弟子二教
及東山問難叩懇悉得其蘊奧祁邑理學之盛自二公發之
東山早歲又嘗從學鄱陽廬牕趙先生介如與故中書右
丞五峯先生燕公楠為同門至元初燕公僉江浙行中書省
事道過祁門訪求東山與論舊故將薦諸朝東山固辭明

夫無子東山有五子稔聞家庭之學明夫夫人王氏請其第三子應新字元美為嗣是為中山處士記識博洽議論慷慨嘗著便民二十條力陳當世要務欲上之臺省不果聞者惜之處士娶同邑貢士石溪先生康鼎實第二女生五子次四是為先生大德八年甲辰正月八日月初出先生生於桃墅里第生而有異處士君謂康夫人曰吾祖考積善陰德多矣或者食報於是兒興吾宗乎甫六歲石溪教之孝經論語孟子隨口成誦日記數

百言後二年冬石溪謂處士君曰吾老矣不及教訓諸外孫汝第四子骨相匪凡宜擇師善教之自是先生從鄉先生學每屈其師日益月異至十歲處士君見先生所學彌進因取東山問學於饒先生講授之書及當時問答之言與先生觀玩遂於理學寢悟乃取朱子四書自定句讀晝夜誦讀恍知為學之要專勤異於儔輩或達旦不寐母夫人見先生勤苦太甚謂處士君曰是兒讀書過勤脫或因是致疾不可不戒處士君呼先生

諭之曰讀書以養氣為主不宜過勞先生曰某自樂此
不為勞也自是讀六經諸子歷代史通鑑綱目等書悉
皆成誦延祐四年丁巳先生年十有四歲是秋鄉里傳
錄江浙秋試三場題目先生一見揮筆成篇鄉先生驚
異曰此天才也明年戊午郡守禮羅婺源道一書院山
長雲峯胡先生炳文於郡庠開堂試以激厲後進先生
屢中郡學及堂試與庠序諸老成相頡頏矣至壬戌春
處士君同先生往饒之浮梁拜可堂吳先生仲迂于州

學吳先生謂諸門人曰新安汪克寬遠來從遊穎異絕倫勇於為學他日必有所成及以所為文印可於吳先生曰讀書明理蘄體諸身文章異時可不學而能也先生既得吳先生之訓遂篤志聖賢之學既歸葺故廬闢書齋於居室之東偏扁曰思復銘於齋壁以自勵焉次年吳先生講道武林勉先生充貢先生答以吾斯之未能信躡等謀進某何敢然至泰定丙寅春聞嚴陵吳先生朝陽以春秋登甲子進士第任鄱陽丞特往訪之朝

陽先生聞其言喜曰子可謂真知作春秋之心法矣是秋邑長令聞先生學行邁異時輩舉應江浙鄉試即中前列次年春先生至京會試論春秋與主司不合又無對策切直遂見黜於中書先生欣然南歸遂奉養之志時貢待制師泰曰德輔年妙而質純才優而學博賈勇秋闈即中高等上之春官輒不偶於主司是得之於數千人之中而失之於數千人之外天道之無常也先生歸自京師刻勵為學痛自修飭遂厭科舉之文慨

然曰道不行於當時矣乃取聖人手筆之春秋博考諸說之同異得失以胡文定公之傳為主而研究衆說會萃成書名之曰春秋經傳附錄纂疏翰林學士虞公序行於世易有程朱傳義音考詩有集傳音義會通禮有經禮補逸綱目有凡例考異其餘論著未可枚舉先生於經史聖賢之言心融神會造詣深劇故為文畧不經意而渾融典雅其教學者誘掖獎勸無不成人後以經學教授宣歙間數與師山先生鄭公講理論學意氣相

得尚書巢深先生汪公謝事家居因遣其孫世賢執經
先生之門四方學者知先生道學之懿從遊甚衆先生
嘗語學者曰聖賢之學以躬行踐履操存省察為先至
於文章特其餘事鰲峰王署諸老交欲以文章舉薦而
先生篤志著述不以一毫利祿動其心諸從學者以先
生所居山谷環遶稱曰環谷四方學者皆曰環谷先生
仍至元戊寅五月居室災先生夜半奉處士君遷於別
室以居奉養備至是年九月處士君以疾卒先生哀毀

踰禮至正壬辰蘄黃兵至先生率長幼避兵深山所居
房舍資財為賊焚掠殆盡簞瓢屢空先生晏如也自是
連歲兵戈擾攘至聖朝戡定禍亂先生始返故廬洪武
二年正月朝廷命行人賁幣禮聘先生至京同翰林潛
溪宋公刪修元史是年九月事畢特旨一班俱留祿仕
先生以老疾力辭不受乃命禮部設宴賜白金三十兩
采段二表裏給驛而還先生抵家以洪武五年壬子十
有一月十二日卒年六十有九先生平居嘗語二子曰

吾歿則祔於盛村之先塋其孤遂以是年某月日葬於其所遵治命也娶同邑聘君和溪先生程公之女勤儉以相成其家業程夫人生與先生同年卒於先生前十九年癸巳五月八日子男二人曰希曰偕女二人長適同邑李傑夫蚤卒次適同里謝子原子原卒而守節誓終其身孫男六人銓鐔錠鉞鐫國英蚤歲從學於先生訓迪最深辱知於先生最厚敬述其梗槩於右俾其孤乞銘於當世之名公以圖不朽焉門人長洲縣學教諭

歛人吳國英撰

明故承務郎左春坊左司直郎貞一汪先生徽行狀

程汝器

先生諱叡字仲魯號貞一道人晚年尼喘疾自稱貞一
病叟汪氏世居徽之婺源號巨族先生曾祖諱瑗祖諱
賓考諱閏俱寬厚禮讓不希仕進先生賦性聰敏穎
悟過人幼知務學年十二能賦詩十五能屬文夏不就
涼冬不附火其族叔祖古逸翁喜其性質超邁務學之

勤收教之日誦經傳千餘言凡有疑難必籍記逐一問
辨其志愈篤同舍咸推讓焉未幾翁捐館是為至元戊
寅夏四月先生執弟子服衰哭之慟其子淮瀾先翁亡
踰年其孫奇樹奇芳力不能葬越十有九年丁酉先生禮
葬於里之高路先生既冠遊於江淮兩浙一時知名之
士莫不器重至正壬午秋嘗應浙江鄉試不合有司歸
家取友於鄉里如倪仲弘鄭子美朱允升趙子常呂安
貞諸先達相與討論既而與族人茂昭子文即里之碧

雲菴玉蓮僧舍窮日夜潛心於諸經子史靡不研窮攷訂融會貫通性命道德之原古今事物之變至於山川嶽瀆草木昆蟲凡天之所覆地之所載者莫不極其所以然之故然後反諸身而自得之體認操存擴充其端以實踐焉會元季干戈聿興四海鼎沸鄉里橫潰殺人如刈草菅先生惻然不忍乃設策與其弟同集義旅以靖鄉邦協天兵以復郡邑凶惡者鋤之柔善者扶之諸大家來依者亦警諭勸化相為保全之計事寧退歸田里

不希進用惟以悅親為心至正丁酉七月居內艱九月
葬鴻村之僊人池己亥七月居外艱越五年癸卯十一
月葬鴻村之瑤竹園三年之間不接人言哀毀踊頓幾
絕葬祭以禮廬於墓側扁其樓曰春暉庚子秋弟同提
兵爭鄱陽不克棄妻孥軍馬廩庫亡之西淝用兵姑蘇
朝廷疑之檄取先生及夫人程氏并次子淵存寓江寧
為質已而知同遇張士誠之害方釋授先生安慶稅令
夫人俱往壬寅夏先生以奏請事宜還京師而安慶城

陷於陳寇夫人與隣婦襁褓赤子淮竄入山谷勢急棄
赤子於草野以身免難家僮余奴亦從竄避見遺赤子
抱以尋夫人不獲求乳於村婦逾旬而後子母以完城
復平定先生自京師復任未逾月朝廷選儒官委叅軍
詹同領入川蜀隨軍叅贊先生以肺疾辭得歸田里洪
武初駙馬和陽王公克恭由新安移鎮會稽從調八閩
先生長子澤先從事王公幕下公素知先生學行廼專
使禮延先生至三山關館於中山之陽再越歲以疾辭

歸洪武甲寅乙卯之歲屢奉朝命郡邑交割勘問先生
疾愈與否郡府命醫視曰肺疾難療由是復命得遂田
園舊居雖臥病中猶激厲鄉里子弟之好學者如邑之
李文徵休陽范平仲吳韞中程子靜皆得造就受任於
朝凡遠近祖宗墳墓有傾圯者務堅完之荒蕪者芟除
荆棘立石碣以表之有白讎者濠梁人也壬寅之歲來
宰婺源廉公有威強暴者畏而疾之甲辰冬鄰境寇作
犯州城陷白公遇害屍暴於河事平先生備衣衾棺槨

買地於環村營塚壙葬之鄉里兵變後有喪不能葬者亦皆為葬焉其奉宗祠祭享一如古制割田四十畝立定規俾子孫永守立祠額曰著存喪亂之餘鄰境銀峯洎水浮梁有流移顛沛來依者悉皆捐粟與之食假室廬於村落俾居之時平皆令復業洪武甲子孟秋朝廷復下徵賢之詔有司敦迫上道至則司禮官引見上舉書之西伯戡黎篇命釋之先生詳析發明深愜聖意時受顧問俾翊贊儲皇授承務郎左春坊左司直郎上亦

日召侍講周旋於兩宮之間與朱善劉三吾二學士趨朝則同班賜坐則聯席入稱三老開陳善道從容獻納天顏每為霽威上嘗憫先生年老氣喘勅賜朝房俾便於趨朝萬幾之暇命續製薰風南來詩諸作稱旨諸近侍臣僚亦皆推遜遇春夏萬物發生之際人有罪至死者先生輒涕泣俯伏進諫請決以時無傷天地生物之仁上允所奏常稱先生為善人明年頒誥寵諭再踰年丙寅仲春先生喘疾大作力疾奏請歸家療病期秋再

至可其請三月朏上御奉天門勅中使傳宣召先生既至賜坐語次顧曰若知所以召見意乎先生起對曰未知曰日昨不嘗以老病故請暫還婺源期秋再來朕可其請有不須辭別之旨已乃思之若等光陰有限言歸有期仲魯喘嗽為病誠劇然恒見得此病者往往壽考矧若龐眉有壽之徵若之心事朕深知之孔子不云鄉人之善者好之其不善者惡之若多讀書何理不窮第心素善於人之善者固好之不善者亦不惡之斯為未

能全好善之心也朕今許若還鄉毋庸再來矣所戒者
近侍之歸郡若邑官勢須來見爾當閉門以絕否則筆
之於簡俾僮僕輩示之若曰仲魯幸蒙聖恩予若還鄉
理宜杜門謝客輸租應役則有恒制矣其敢以是自連
厥戾如是則可考終命矣先生叩首謝曰聖上愛人以
德適承聖訓是欲臣全其晚節者敢不欽佩以期毋負
上心明日辭朝都門送車百兩觀者填道莫不嗟咨詠
歎以為千載一遇也先生之道和而純其用莊而毅內

之孝外之仁默而智言而信窮而不憂樂而不淫為學
推孔孟之道必求諸其中所為文章深而博厚淡而古
雅賦頌詩歌其要咸歸于正積有十帙名曰浯溪集又十
有六年考終於正寢先生生於元至治三年癸亥冬十
月二十又三日不祿於大明洪武三十四年辛巳春三
月二十又三日先生寢疾甫三日又明日始旦命子澤
奉水進盥盥卒廼正衣冠端坐形神朗全具蔬食進又
稍益方徹謂子若孫曰汝輩宜安分守禮義謹言行

以保其身事死如奉生勿作佛事祭惟隨儀不必豐惟
在誠敬言既正身斂手晏然而逝享年七十有九子男
四人適長曰澤弱冠從事於金陵兩浙八閩兩廣嶺海
邊成年五十甫告歸養親獲終其孝適次子淵年四十
四以進呈田畝圖冊所司責緩罰造京官第宅歿於江
寧適次二曰淮年二十九亦以圖冊事罰役未畢從歿
於京之石城門庶曰潭年三十一繼役於京還感疾而
歿紹男一人曰渚幸無恙女一人曰浯年十六適里之江

里仁孫男八人柱梁樞櫨榮樑杞楚惟梁更名良士由
邑庠生中永樂癸未鄉試登甲申進士第擢虞城宰孫
女九人樟楣慶拱楹楠楷移桐曾孫男五人熙照煜烜焰
曾孫女二人美罄嗚呼先生信道甚篤所謂富貴不
能淫貧賤不能移威武不能屈者喪亂流離則危而持
顛而扶安人澤物以底於昇平其子適庶暨紹者五不
幸淵潭淮俱以王事歿於中外幸適長子澤雖從事遠
戍老則歸養送終而渚仍輔協之得非皇天不憖遺一

老之意乎前三越月澤竭吉卜奉葬於鴻村瑤竹園
負已丙挹壬亥是歲之四月十五日也夫人程氏同穴夫
人先於先生十年歿是為洪武二十三年庚午秋七
月望前一日年六十有九葬以其年八月十有五日側室
許氏年六十有九無恙汝器嘗遊先生之門不可以無
述廼書其耳目見聞之大槩狀諸篇簡尚求名公誌
而銘之以傳不朽云時永樂乙酉秋八月望日前承務
郎金華府浦江知縣松蘿程汝器狀


按洪武十七年八
月乙未以儒士汪

欽定四庫全書

新刊文淵堂
卷七十二

仲魯為左春坊左司直郎語曰朕嗣子求善人輔導以成其德豈易云哉夫人固有能言而行不逮者亦有能行而訥於言者蓋非言無以達意非行何以取信惟善言不迫故聽而不厭善行不虧故近而不狎從出入侍起居能格非而不撓承顧問進講說在即物以為喻小則以諷大則以戒若積篲土期於成山若導衆流期於會海苟非備此曷稱厥職茲特授爾仲魯承務郎左春坊左司直郎爾其輸忠效誠陳善閉邪無有所隱斯為美矣仲魯徽之婺源人以明經辟至京上詔諸儒講論仲魯講書之西伯戡黎篇辭旨明暢上甚嘉之遂授是職洪武十九年三月辛未左春坊左司直郎汪仲魯以肺疾乞還鄉上許之明日復召至便殿賜坐顧謂曰汝昨以疾告歸期秋復來見朕知汝疾劇宜休養以延老壽汝平生力為善今鬱然龐眉乃壽之徵更慎起居精藥物以終餘齒無庸再至也仲魯為人敦實簡靜不妄言笑進講兩宮歷三載遇事輒言明白簡直上嘗以善

人稱之始終
被禮遇云



新安文獻志卷七十二